

# كيسولة قبل الامتحان

سارة محمد سيف





السلام عليكم ورحمة الله وبركاته

# كيسولة قبل الامتحان

لـ سارة محمد سيف



### -الإمتحان قرب وما فتحتش مادة .. مش هألق أخلص ولا هألق أذاكر!

الأول سمى الله كدا وخد نفسك لا تزور ولا عرق يطق .. مين قال إنك مش هتألق؟ بأمر الله هتألق ^^ .. الفرق بس اللي كنت هتذاكره ف ترم هتذاكره ف كام يوم .. هتضغط نفسك بدل ما تمشي براحتك .. وأحياناً الضغط دا بيبقى نتيجه أحسن من الدلع .. حسب شخصيته كل واحد

### - يعني هألق متأكدة ؟؟!

أيوووه .. مش قولنا إن شاء الله .. وبعدين أنت أكيد عارف قدرات نفسك فهتقدر .. كام إمتحان عدى وأنت زي الطل بتعدي صاغ سليم .. مش سليم أوي يعني .. بس تلقب بالسليم .. ماشيها كدا بلاش إحراج يا جدع الله ..

### - طب قوليلي أعمل إيه عشان ألق؟!



أولاً بلاش بخل .. فيه قاعدة كدا بتقول لازم تعطي عشان تاخد .. يعني ما ينفعش تبقى عارف الدكتور الفلاني قال دا جاي وتخبي .. أو كاتب المحاضرة العلانية وتبخل على زمايلك

وترفض تديها لهم .. وأنت عارف إنه قليل مثلاً اللي حضرها أو ورقك أسهل لأنه فيه شرح لتفاصيل صغيرة وتوضيح بالعربي بالبو كدا عشان الجزء دا ما يتفهمش غير كدا ..



### L- بس كدا هما هيجيبوا زي ومش هأتفوق عليهم؟!

يا بسبوستة؟! .. وأما أنت عايز تتفوق أوي كدا ما ذاكرتش من أول الإجازة استعداداً للي هتاخده في الدراسة ليه؟؟ .. ولا أنت جاي تسألني وتطلب النصيحة مني فراغ عاطشيفي عندك؟!

بس بقى يا برنس! .. كل الناس عندها عقل مش كدا؟؟ .. بس فيه اللي بيستخدمه ويشغله وفيه اللي لامؤاخذة يعني بيتغابى ويخليه يصدي من قلته الشغل .. زي الحكومة .. إحمر إحمر .. العفو عليهم يعني .. وكل الناس عندهم إيدين (إلا من ابتلاه ربي) بس فيه اللي بيستخدمها ف السرقة واللي بيستخدمها ف حرفة

أهو دا بالظبط حالك .. أنت ممكن تكون كاتب المحاضرة ومنزلها .. وتلاقي واحد فتحها وذاكرها وهو دا السؤال اليتيم اللي عرفه ف الإمتحان كله ودا أنت أخذت ثوابه

وواحد تاني ذاكر المنهج كله كله بس عنده فقدان ذاكرة بايضوحباطي (ما تحولش تقرأها عشان أنا كتبتها بالعافية وخوفت أراجعها أتجنن) .. فدخل الإمتحان نسي المحاضرة بتاعتك اللي ذاكرها .. ودا أنت عملت اللي عليك بس هو اللي ذاكرته ذراكت دبانه

وواحد تاني ملقط من كل فصل صفحة ومحاضرتك دي هي اللي خليته يجيب الدرجة اللي لو ماكانش جابها كان شال المادة أو حتى عاد السنة كلها

شوفت فيه اختلافات إزاي؟ .. وغير كل دا إفرض كدا إنك ما نزلتهاش وخليتها لنفسك .. مش يمكن ربنا يعاقبك على أنانيتك ويعلمك درس في عدم البخل والإيثار فتدخل تلاقي نفسك مش عارف تحل الأسئلة اللي في المحاضرات بتاعتك دي .. ويمكن غيرها كمان (بتحصل صدقني بس أنت ونصيبك)

يا ابن الحلال نزلها وأرمي تو كالك ع الله، اللي مكتوبك هي جياك سواء نزلت أو لا بس يمكن تشيل عنك أذى تاني الله أعلم بيه ..




### - طب ما في ناس دحيحة ومش بينزلوا بردو إشمعنه أنا ؟؟

لا حول ولا قوة إلا بالله .. طب دول ناس أنانيين طماعين جواهر نقطتة سوده عايز تبقى زيهه ليه ؟؟ .. ليه ما تقارنش نفسك بالفاشل اللي بيفضل يكتب محاضرات طول السنه وينزلهم للدحاحين وف الآخر بيحبيب مقبول وساعات بيشيل مواد !، خلي هدفك دائماً إنك تبقى أحسن من غيرك .. وبعدين أنت عايز تبقى زيهه ف إنهم مش بينزلوا ورق لزمائلهم ومش عايز تبقى دحيح زيهه ؟؟ .. لما تقارن أبقي قارن ف الكل وبلاش مقارنة نص كمر دي ...

### - خلاص ماشي ما تزوقيش لو كتبت حاجه هأنزلها ... المهم

#### قوليلي بقي أعمل إيه وألحق إزاي ؟؟



صلي ع النبي يا عموناا، أهم حاجه .. إنك تبعد عن أي صاحب (أو شبه صاحب) بيحاول يحبطك .. (إحنا هنسقط) "المادة ما بتتلمش" ( المنهج كبير) "الدكتور الفلاني قال حاجات هتيجي في الامتحان وماحدث كتابها" ... إلى آخره




طب هو عرف منين أنه المنهج كبير إلا لو كان فتحه؟، طب عرف منين إنه الدكتور قال حاجات ماحدش كتابها وهتيجي إذا كان هو مش عارفها ؟؟ .. هو يجوز سمع من أحد الدحيحة اللي حضروا .. بس الله أعلم دا صح ولا لا .. أنت خلي نيتك صافية بس ف نفس الوقت .. خليك كيس فطن حذر

أنت مش هتخسر حاجه لو حرصت "حرص ولا تخون" .. دا غير إنه الكلام دا هيقفل الدنيا ف وشك حتى لو سالكت .. لأن البني آدم عينه دايمًا تدور ع الناقص وع الصعب .. فتنسى الحلو والسهل .. زي بالظبط قصة الضفدعين اللي وقعوا ف الحفرة وكانت غويطه أووي .. فضل الضفدعين ينطوا ينطوا عشان يخرجوا بس مافيش فايده وبقيت الضفادع اتجمعوا حوالين الحفرة وقعدوا يقولوا (الحفرة غويطه مش هتقدروا تخرجوا "أنتوا هتموتوا فيها ومش هتعرفوا تطلعوا" وغيره من الكلام اللي يكسر المأديف دا .. لحد ما واحد من الضفدعين تعب واستسلم ومش ورا كلامهم ووقع مات ف الحفرة فعلاً .. لكن الضفدع الثاني أتحمس وبدأ ينط أعلى وأعلى لحد ما الحمد لله خرج والكل ماكانش مصدق وقعدوا يهللوا وفرحانين .. طلع أنه الضفدع دا أطرش .. ما سمعش الكلمات والإحباطات اللي قالوها وافتكرهم بيشجعوه يطلع فعزيمته قوية .. ما إنهم كان ممكن يحاولوا يخرجهم بدل ما يتفرضوا عليهم كدا وبس !

اللي عايزه أقوله .. الصاحب اللي يشجعك ع النجاح دا أمسك فيه ..  
شجعه وشجع نفسك بيه واللي مش كدا .. أديله إستمارة ستّة .. وياريت  
كمان خمستاشر نسخه عشان لو واحدة ضاعت يلاقي غيرها

- إمام خلاص نبعد عن شلة الفساد ..  
إيه كمان ؟

قديمًا كانت الطالبة التي تدرس لوقت متأخر  
من الليل تربط شعرها بمسمار حتى لا تنام .



الاختبارات على الأبواب يا بنات ، هههههه

الاجتهاد من أجل النجاح يا بنات ، هههههه

هجر كل ماله علاقةً بالتكنولوجيا  
ومواقع التواصل الكتابي .. من واتس  
أب وفيس بوك وتويتر وجوجل بلس  
وأسك .. إلى آخره

دي سبب البلاء والإبتلاء أساساً .. زمان  
ماكانش فيه تليفزيون ولا تالبت ولا  
أي فون خمشاشر فكان ما وراهمش لا  
شغله ولا مشغله إلا المذاكرة ..  
دلوقتي إحنا مش فاضينها أصلاً !!

ويا سلام بقى .. التلفزيون طول السنة شغال عرض لأفلام معفنة  
ومسلسلات طويلة مملة وبرامج تقرف طووووول الترم وتيجي وقت  
الإمتحانات تشغلك أربز جوت تايلاند وفيلم شريك الجزء اللي كان  
لسه ف السينما ومسلسل مين اللي كان نفسك تشوفه .. وتخرج من دا



وأختك الصغيرة من الحضانت والبت تفيدة بنت الست أم فلافل تشيلها  
الشيلته ذات الوزن الذي يقرب من تمناشر طن .. فتحرم وتحلف ما أنت  
واخده .. أو تسلمه لوالدك ربنا يقويه على أشكالك من الفاسدين  
فلما تطلبه تسمع صوت توكتة الحزم اللي المفروض مالهاش صوت ..  
وتكون النتيجة إنك تفقد حاسته البصر فمش هتشوف لا كتاب ولا  
واتس أب

**- ماشي بس أنا ماما كل شوية تتصل بيا عشان تظمن عليا**

**أو أجيبها حاجه كدا يعني .. هاعمل إيه وقتها؟**

لا ما أعرفتكمش أنا يا ولا !، إيه الحنية وبراءة الأطفال في عينيها دي  
.. بسيطة .. أكيد والدك عنده عدة من عدد نوكيا القديمة اللي  
بتقول ألو وتقفل .. أو اللي بتشحنها أول يوم وتبقى ١٠٠% وبعد ٣ أيام  
بالتمام والكمال تبقى ٩٩.٩% .. فين ديتول تيجي تتعلم .. المهم ..  
استعيه منه كدا فترة الامتحانات عشان نوبات البر بالوالدين والعطف  
ع الصغير اللي بتيجي عليك دي

## - طب ساعات جروب الدفعة ع الفيس بينزلوا حاجات مهمة هاوصلها إزاي؟

إمهمم، بص قبل الامتحان أو ف اليوم اللي بتخلص فيه الامتحان دا تروح وتجييب الكمبيوتر أبو نص ساعة تشغيل دا وتقعّد تنزل ع الكمبيوتر نفسه كل اللي يتعلق بالمادة اللي هتذاكرها دي من قريب أو بعيد .. بعدها تنادي أخوك الصغير اللي مسمينه "معلم الشيطان الأكبر" وتخليه يغير باسورد الراوتر .. وهو طبعاً أما هيصّدق عشان ما تبطلوش سرعة النت وهو بيلعب صاب واي .. أي نعم مش هيعرفك الباسورد إلا بعد ما يطفحك التراب ويمشيك عريان ف الشارع وتقول أنا مجنون أنا مجنون .. بس كله فدا العلم يا صديقي

ولو جد جديد على جروب الدفعة خلي حد من صحابك اللي بيشجوعك يقولك الجديد أو لو قالوا فيه ورق فلاني يجبهولك أو تنزل تجيبه .. طبعاً دا بعد ما تتفقوا إنه كل واحد عليه الدور ف إنه يقاوم شيطانه ويفتح الفيس بس عشان يشوف جروب الدفعة ويقفل بسرعة عشان يكمل مذاكرة .. ودا على أساس إنه أكثر واحد بيحب المادة هو اللي هيفتح فيس لانه من حبه فيها مش هيستحمل فراق كتابها .. ولو لا قدر الله فيه مادة كلكوا تمقطوها أشد المقط .. فأكثركم تضحية بقى يفدي البقية نياهاهاها

## - في حاجه ثاني ولا خلاص ؟

النصيحة الأخيرة .. ألتزم بالصلاة ف وقتها .. ساعات بننسى نفسنا ونندمج أوي ف المذاكرة ونسمع الأذان ونقول لا لما نخلص الحته دي عشان ما أقطعش حبل الأفكار وخلافه .. أنت أول ما تسمع الأذان ولاقيت نفسك تقدر تقوم تصلي دلوقتي قوم أتوضى وصلي .. لو



حاسس كدا هيشنت تفكيرك فقدامك مهله لحد الإقامة بعد كدا قوم صلي .. ما تنساش إنه المذاكرة سعي ف الدنيا إنما الصلاة دي دنيا وأخرة .. "من صلحت صلاته فقد صلحت حياته" .. وصدقني الصلاة هتزود تركيزك جداً لأن ف السجود المخ بيندفع له الدم بقوة فبيعوض لو الأكسجين كان ناقص فيه

ويقوي الذاكرة كمان .. وخدها فرصة وطول ف السجود وأدعي ربنا يقوي ذاكرتك وقدرتك على حفظ المعلومات وفهمها ... ويستحسن إنك تتوضى مع كل صلاة، عشان الوضوء بيضوق وينعش .. فلما ترجع تكمل تبقى أخذت نفسك وريححت جسمك شوية وتركيزك يرجع أقوى

## - طب المذاكرة نفسها تبقى إزاي ؟

# يستحسن المواد الأدبية واللي محتاجه حفظ تتذاكر قبل النوم، لأن العقل بيبقى مبرمج على إنه يحفظ ويخزن آخر حاجه دخلته بشكل أحسن عن اللي كان خلال اليوم كله، فهتلاقي المعلومة ثبتت وبلاش تبدأ اليوم وتصحى الصبح بدري على مادة حفظ أو أدبية وعن تجربته

أنا ف مرة كان عندي ثاني يوم إمتحان ميد تيرم ف مادة عبارة عن حفظ فقط لا غير بأسامي لاتيني كذا مكلعه (اللهم احفظنا) وجيت باللي قبل ما أنام بساعتين تلاته وقعدت احفظ .. لحد ما لاقيت الحفظ سهل وأول صفحتين ثبتوا الحمد لله روح قوت كفايه كذا وخلي الأخيرة لبكره .. ونمت صحيت بقى وقوت احفظ آخر صفحة لاقيتني قافله ودماعي حالفه إنها ما تدخل كلمته زيادة .. كأنها بتقولني يوم ما تصحيني تصحيني على حفظ .. وبعد مناهده أخيراً حفظتها بس لما دخلت الامتحان نسيته .. على عكس الصفحتين الأولانين .. أي نعم فيه منهم اللي نسيته بس ما كانوش اترجعوا قبل الامتحان عشان انشغلت ف الحفظ الجديد

حاول تخلي المذاكرة الصبح بدري تبقى بمادة بتحبها أو متقبلها شوية وحاسس إنك هتفهمها بسرعة .. وتكون ف نفس الوقت محتاجه تشغيل دماغ على قد ما تقدر.



# أفضل أوقات المذاكرة هي فترة الفجر لحد ٨ أو ٩ الصبح عشان الجو بيبقى هدوء والجسم لسه ما بذلش أي مجهود فهيكون ف عز نشاطه، أو وقت العصر للمغرب بيكون التركيز أعلى من الليل والظهر لكن أيام الإمتحانات اللي بتذاكر من لما تصحى لحد ما تناو فربنا يعينك يا ابني .. أنت تخلي الأجزاء اللي محتاجه تركيز عالي في الاوقات دي



# القيلولتة .. دي سنتة عن الرسول -عليه الصلاة والسلام- عبارة عن تريح للجسم أكثر منها نوم .. دي بتبقى من الظهر للعصر من مدة ١٠ دقائق لثلاث ساعة والبعض بيقول نص ساعة .. بتنام فيها (أو تريح) وترجع تكمل يومك .. بتدي نشاط للجسم .. لأن الجسم ف الفترة دي بيبقى ميال للراحة

والكسل لكن القيلولتة بتفوق وتديه دفعة إنه يكمل اليوم

بس أبعد عن العيلولتة ودي النوم بين فترة العصر والمغرب لأنك هتصحى تلاقي نفسك تعبان وجسمك مكسر ومش قادر تكمل وهتبقى حاسس إنك عايز تنام تاني وفيه البعض قال إنها فترة ظهور أي مرض كامن ف جسمك .. والنوم بيسهل ظهوره فإحذر منها

# الوقت .. ما تناساش إنه الوقت كالسيف إن لم تقطعه قطعك .. استغل الوقت على قد ما تقدر .. عشان هيجي ف يوم هتحتاج الوقت دا

.. فيه كثير بيتمنى يحفظ الوقت ف حصالة ويطلعه وقت ما يحتاج  
بس دا مش بيحصل فاستخدمه واستغله عشان اختراع الحصالة دا لا  
طلع ولا هيطلع

# المنبهات .. بلاش أكثر من مج نسكافيه وفنجان قهوة وكوبايت  
شاي ف اليوم .. لأنها مش بتخليك تركزي ما أنت فاكرك .. وممكن  
تعوض بإنك تاكل تفاح اللي بيساويهم في التنبيه .. والأحسن أنك



تشرب حاجات زي (القرفة) دي بتساعد  
ع التركيز وتنشط الذاكرة وبتسهل  
استرجاع المعلومات من المخ، (النعناع)  
يمنع تشتت الذهن ويقوي الذاكرة  
والتركيز ويساعد على هدوء الأعصاب  
وعلاج التوتر والقلق، (اليوسفي،  
البرتقال، الليمون، الموالح) دي نفس

مفعول النعناع والقرفة وهتفيد أكثر الناس اللي مش بتعبا غير وقت  
الإمتحانات لأن التوتر والقلق بيضعف المناعة فيبقى سهل إصابت  
الجسم بأي فيروس أو مرض .. المشروبات دي بتقاوم البرد والإنفلونزا  
وتقوي المناعة دا غير إنها ترفع التركيز والانتعاش وتقوي المناعة.

واللي بيعب المنبهات (كيف بقى) .. سمعت ف مرة إنك تشرب  
النسكافيه وبعدها تنام وقت القيلولة لمدة ما تزدش عن النص ساعة

بيدي طاقة ونشاط تكمل خصوصاً لو بقالك كذا يوم ما نمتش (دور على المعلومة ع انت بالظبط لأنني قريتها من فترة كبيرة)

# دعاء بدأ المذاكرة والإنتهاء منها، في فترة ما .. ما كنتش عايزة أحط صورة في البراويز لأن أخويا (بينام معايا ف الأوضة) بقت تجيلك كوابيس ويشوف حاجات ف الأوضة ويتخيل حاجات بتتحرك ولما بحثنا ف الموضوع قالوا ممكن تكون الصور أو تماثيل أو ألعاب معينة السبب فشيلنا الصور خالص، المهم هنرمي البراويز؟؟ وأنا كأى زوجة مصرية مستقبلية هتحول فأنلة جوزها لحتة قماش للمسيح .. قعدت أفكر لحد ما جاتلي الفكرة دي .. جبت ورقة بيضا وكتبت عليها دعاء قبل وبعد المذاكرة وحطيتهم ع المكتب قدامي في البرواز عشان كل ما أجي أذاكر تقع عيني عليهم أقرأهم .. فيه البعض بيقول إن الأدعية دي مالهاش أساس لكن تعتبر دعاء .. والدعاء مقبول ودا كفايه

# فيه البعض يقولك ثبت مكان المذاكرة .. عن تجربة الطريقة دي فاشلة جداً .. ومافيش حاجة بتثبت إلا مكان المذاكرة .. الأصح إنك تثبت مكان مذاكرة مادة معينة .. يعني (هأطبق على مواد كليتي) التشریح على الكنبه والفسیولوجی على المكتب والسلوكیات على الأرض وهكذا .. هتلاقي نفسك بتفكر المادة بالمكان بتاعها (رابط) .. والأحسن والأحسن .. لو قدرت تخصص لكل فصل أو باب جوا المادة دي مكان لوحده ..

كان عندي امتحان مادة وكنت يادوب قريهاها ليلته الإمتحان (مش مهمه أصلها) وبعدين روحت الكلية على أساس إنه الإمتحان ٩ طلع ١١ فقولت أهى فرصة اراجع .. قعدت في الجوينية مع صحابي نراجع سوا هي تقول الكلام باختصار وإحنا نحفظ وراها لإني اكتشفت حاجات جديدة ماكنتش اعرف إنها علينا .. المهم لما طلعت الإمتحان جالي سؤال من اللي صاحبتي كانت بتحفظهولي .. المهم افكرت الجوينية وإني كنت ف الحتة الفلانية وكانت هي واقفه بزواية شوية وهوووب افكرت الكلام وأصلاً كنت ناسيه اللي راجعته مع نفسي .. القصد إنه الطريقة دي جابت معايا نتيجة .. جربها يمكن تنفع معاك

# غير من طريقة المذاكرة .. أحياناً التغيير دا بيدي متعة في المذاكرة وتشجعك تكمل .. يعني مرة ألبس كاماه وسمع لنفسك بصوت عالي الصوت هيطلع مختلف وهتقدر في الامتحان إن شاء الله تفكره أحسن وتفرقه عن بقيت اللي حفظته بنبرة الصوت اللي طلعت مختلفة ..

بدل ما تشاور بقلم .. شاور بصباغك .. شاور بمشرط (معلش بيطري مآثر) .. غير

# لخص الكلام .. يا فرحتي ب ١٠ نقط كل واحدة ٣ سطور وف الإمتحان ما افكرش حاجه ! .. لخص ال ٣ سطور على قد ما تقدر .. جيب المفيد واللي عايز يوصله مش حيث كانت هذه الطريقة من

الطرق التي لا يرغب فيها ... بلا هجس وكلام فكس .. أحفظ المفيد  
والحشو أحشيه أنت ف الإمتحان وما أسهل عمايل الكلام المحشي

# لووون .. لو عينك مش بتتعب من الكمبيوتر أو التاب لما تفتح فيس  
٢٤ ساعة .. ولاقيت السورس بتاع مادة أو جزء منها نازل من الدكتور أو  
حد كاتبه ملون ذاكر منه .. إختلاف الألوان بيثبت لأنه بيعمل تغيير  
ولو بسيط للعين فيشد انتباهها

أو لو أنت بتذاكر ف ورق الكلام فيه مكتوب أسود .. ظلل عليه  
بالأقلام الصفوري أم اتنين ونص دي

♥ # إرسم .. طلع الفنان اللي جواالك .. لو مثلاً بتذاكر قلب إرسم قلب  
لو فيه نباتات إرسم وردة .. إعمل ربط لصور بكلام حتى لو مالهوش  
علاقة ببعض مش لازم تبقى فنان يعني ولا تعمل الوردة بشوكها، رسم  
كروكي يفكرك مش أكثر .. إعمل اختراع .. ألف قصة ما بينهم  
.. وأديك طلعت موهبة تانيّة "التأليف" اللي بتصل لأعلى دراجتها ف  
الإمتحان

# أتكلم بصوت عالي .. رص الدباديب اللي طانطك فيضي وميمي  
وجيجي جابهوملك ف عيد ميلادك واشرحلهم .. وخصوصاً لو مادة  
رزله ورخمه عشان تعذب الدباديب وتخلياك طانطاك دول مكانهم  
وبتنتقم لكرامتك ك مان منهم

# سبورة بيضه اللي بيتكتب عليها بالقلم دي أو السودا اللي بيتكتب عليها بالطباشير، ذاكر وأحفظ عليها أو أشرح للدباديب عليها .. هي خمسه جنيه ف المترو جبتها لبنت قريبتى بس طمعت فيها وأخذتها

# أكتب ف الهامش، الأطراف بتاعت الكتاب البيضاء دي اللي ف كل صفحة .. لخص فيها .. واتحدى نفسك إنك تلخص الفقرة دي كلها ف الحتة دي .. والله بتنفع أنا كنت بذاكر (كيميا حيوية) واللي يعرفها هيستغرب أنا عايشه إزاي .. المهم كان فيه تعريف لمواد تخيلية طبعاً واسرح مع نفسك يا باشا وحاول تفهم وهو بيلف ويدور حوالين نفسه ... كانت حوالي ٦ سطور !، لخصتهم ف مربع جواه المادة الأولى ودائرة جواه المادة الثانية وبينهم + وبعدهم = واسم المنتج .. بس دول الـ ٦ سطور والسطر فيه خمشاشر كلمة .. جاتلي ف الامتحان .. أغلب صحابي ما حدش عرف يحلها .. وأنا كنت ناسيه الكلام .. بس افكرت الهامش اللي عملته .. رocht رسمته ف ورقة الإجابة وحولته لكلام وربطهم ببعض بتحابيش .. بس فما تستهونش بكدا

# أفهم .. مهما كانت المادة حفظ ما تقنعنيش إنها مش هتحتاج فهم .. الفهم ببس سهل الفهم بمراحل .. أنا حتى الآن لو المادة ما اتفتحتش غير قبل الامتحان إن شا الله بليته مش بأحفظ غير لما أفهم وبأدور ع النت واقرأ عشان أفهم .. وصحابي يقولولي احفظي احفظي هو دا وقت فهم ؟؟ .. بس أنا كدا مش بأعرف احفظ الا أما أفهم .. لاني بافكر اللي فهمته واللي حفظته ممكن عقبال ما ابدأ اكتبه انساه ! ..

# احكي لنفسك حدوتة المذاكرة .. التاريخ بيبقى فيه أحداث كتير ومعارك أكثر .. كأنهم كانوا مخلوقين يتخانقوا ويحربوا ويطلعوا عينا إحنا ف المذاكرة .. اقرأ الأحداث دي وشوفها قدام عينك بخيالك إنها مسلس أو فيلم ولو ليها مسلس أو فيلم شوفه ع انت مافيش مشكلت .. هيسهل عليك كتيرر ويوفر وقت .. وقبل النوم اختار ديدوب من الدباديب اللي بتعذبهم بالشرح وخذ ف حضنك وقوله تعالى أشرحاك حدوتة صلاح الدين ف موقعة حطين .. وصدعه وجبله ورم مش مهم المهم أنت تحفظ

### # المذاكرة بكل الحواس

٢٠% من مانقرأ

٣٠% من مانسمع

٤٠% من مانرى

٥٠% من مانقول

٦٠% من مانعمل

٩٠% من مانرى، نقول، نسمع ونعمل.

# فيه ناس مش بتعرف تذاكر غير ف الدوشة .. حققوا .. شغل الراديو واسمع وذاكر مع إني مش بأقتنع لأنه الدوشة اللي جانبك دي هتعملك صداع من غير ما تحس لأنك بتبقى مركز ف المذاكرة



وفيه حاجه بتحاول تقطع التركيز بس أنت بتقاوم .. فتفضل تحارب  
تحارب لحد ما ترمي الكتاب وتشتم ف المادة واللي حطوها وانه ما  
نابك إلا الصداع .. مع إنه الصداع أصلاً مش من المادة قد ما هو م اللي  
بتسمعه

لازم تعود نفسك ع الهدوء عشان لجنة الامتحان ساعات بتبقى قمت  
الصمت لدرجة إنك لو القلم وقع العامل اللي واقف ع الباب هيسمع  
صوته

أما الناس اللي بتذاكر من الساعة ١٢ واحدة بالليل دي عشان الهدوء  
ومش عايزة تسمع صرخ ابن يومين .. تحاول ف مرة ولو لمدة قليلة  
تذاكر ف دوشة .. عشان تتعود لما يبقى فيه سوكة القرعة بتتجوز  
ف شارعكوا والدي جي متوصي ما تزعجكيش وتقدر تركزي ..  
كمان لجنة الامتحان ساعات بتتحول لخناقات فتقدر بردو تركيز ف  
همك

# قبل ما تمسك الكتاب روي سرحي شعرك اللي شبه عش الدبابير  
دا، حطي برفان واتهندي أعتبري الكتاب دا حبيبك وكأنك رايح  
رانديفو .. ع الأقل دا اللي هيعملك مستقبلك مش هيدمره .. ادخلي ع  
الكتاب بإبتسامه وانشكاحه .. وقوليله زي ما بتقولي لعبده أوانس ..  
بص .. أنا هأفهمك يعني هأفهمك .. بكيفك أو غصب عنك (نفس

الكلام للولاد عشان ما يفرحوش أوي) .. هتلاقي نفسك اتفتحت  
وانسجمتي جداً

# لو فيه دبان أو نموس ف الأوضة رش بيرسول واقفل عليه ربع ساعة  
وارجع رش معطر جو أو ولع عود بخور .. مش لازم تفضل كل كلمته  
تهش ف الدبانه وتضرب ف النموسه وف الآخر تقول حتى أنتوا مش  
عايزني أذاكر وتقل الكتاب وتفتح الفيس .. حركات قرعه (عملتها  
قبلكوا)

# الإضاءة .. ضبط الإضاءة بحيث تكون لا قوية ولا ضعيفة وتكون ع  
الكتب مش ع قضاك أو وشك .. نظرية إنه الأشياء هي اللي بيسقط  
عليها النور وبعدين عينك تعكسه ع الكتب عشان تقرا دي اتلغت من  
زمان وجه، جد جد جد ... جدك ابن الهيثم اثبت بالدليل القاطع أن  
الضوء بيسقط ع الكتب بعدين ينعكس على عينك فبتقدر تقرا  
(اتثقفوا شوية)

# لو بتتشجع لما تذاكر مع صحابك ذاكر، لكن لو بتقضوها ف لعب  
بلاي استشن أو نميمته على فالانه اللي اطلقت .. يبقى كل واحد فيكوا  
يروح ف طريقه أحسن .. ومش عشان أنت بتقدر تذاكر مع صحابك  
بالضرورة هما بيحبوا .. لو بيحبوا يذاكروا لوحدهم خلاص كل واحد  
وطريقته



# المكتب ما يبقاش عليه أي حاجه غير الكتاب أو المذاكرة أو الملزمة اللي بتذاكر منها دلوقتي .. أي حاجه ليها علاقة بمادة تانيه أو نفس المادة اللي بتذاكرها أرميها تحت المكتب وارفع عليها رجلك عشان ما تنملش م القعدة .. لأنه كل ما عينك تزوغ من ع الكتاب وتبص على الكتب والورق المرصوص

قدامك لو نفس المادة هتفضل تقول .. دا أنا فاضلي كذا وكذا وفيه كذا وكذا عايز يتراجع وكذا وكذا عايز أبص عليه ف السريع وف الآخر مش هتعمل أيتوها كذا من الكذاهات الكثير دي حتى اللي قدامك مش هتعرف تركز فيه .. لو من مواد تانيه هتقول يوووه دا لسه فاضا كذا مادة .. والمادة الفلانيه طويله والعلانيه أطول ومش هتركز لا اللي ف إيدك ولا اللي لسه ما وصلتلهاش



# ابدأ بمادة بتحبها، ولو المادة اللي هتمتحنها ابدأ بأصغر أو أسهل جزء ف نظرك .. عشان يديك حافز تكمل وإنك تحس أنها أسهل مما تتخيل

# كل ما تيجي ف دماغك فكرة سلبية

أنا مش هأنجح مش هألحق فاشل بأنسى أكتب عكسها على طول ف الورقة اللي بتذاكر فيها أو على طرف الكتاب، كل ما عينك هتيجي على الجملة التحفيزية دي هتلاقي عقلك الباطن خزنها من غير ما تشعر وحوّلها لسلوك تلقائي بأنك تنجز وتذاكر وتفهم

# حدد الجزء اللي بتذاكره والوقت اللي هيخلص فيه بس يكون ف المعقول يعني مش تقول هأخلص ١٠٠ صفحة ف ربع ساعة .. لا شوف قدرتك وامشي عليها .. هتلاقي عقلك برمج نفسه تلقائي وبدأ يعد من وقت ما بدأت لحد مثلاً ساعة زي ما حددت بعد الساعة دي هتلاقي نفسك فعلاً خلصت الجزئية دي .. لا سحر ولا شعوذة وعن تجربة برردو .. لو مش عارف أنت ممكن تخلص قد إيه ف مدة قد إيه .. إدي لنفسك ساعة وابدأ ذاكر لما تخلص شوفت ذاكرت كام صفحة وأعرف إنك غالباً ف الرينج دا زيادة صفحتين أو أقل صفحتين .. حسب المادة كمان وحبك ليها أو صعوبته .. بس لما تبرمج نفسك على وقت يبقى الوقت دا كله مذاكرة مش شوية أشرب وشوية اكل ومرة أنام ١٠ دقائق

عشان أفوق



# ف وقت الراحة بين كل فترة التانية .. حرك جسمك، رياضة خفيفة، اتمشى شوية ف الشقة وزور الصالون وكدا .. فك عضلاتك اللي اتيبست م القاعدة وكل ساعة ريح ١٠ دقائق



# بطل لكاهه .. خلي إزاة مائه جانبك وطبق فيه فاكهة أو خضار معاك ف الأوضة بس مش قدام عينك يستحسن يبقى ضهرك ليه .. لأنه لو قدامك سوا جعان أو لا هتأكل لكن لو مش قدامك مش هتدور عليه غير لما تجوع

- الوصايا وفهمناهم .. طب التركيز ؟؟

**مش بأقدر أركز !**

الحل ف مثلث التركيز اللي عبارة عن (الإسترخاء - الإنتباه - الإهتمام) .. لو حسيت إنك مضغوط أي معلومة هتدخل هتطير على طول .. خليك ريلاكس .. وأنسى الكلاكس .. طمن نفسك بأنك هتعمل اللي عليك وربنا هيجازيك على قد تعبك .. وإنك تعمل جزء بس بتركيز وإتقان أحسن من إنك تخلص المنهج كله كروته أي كلام ..

لازم تكون منتبه وعارف أنت بتقرا وبتذاكر إيه .. بلاش السرحان وأحلام اليقظة مش وقتهم ولا مكانهم دلوقتي

لازم تكون مهتم باللي بتذاكره .. فكر نفسك أنه دا هيفيدك بعد  
كدا ف إيه، وإنه أهلك هيفرحوا بنجاحك إزاي .. وأنت هتبقى فخر  
للمجتمع ولدينك لأنك هتضيف بينهم عالم أو متعلم بيضيفهم

### - بالنسبة للذاكرة اللي بقت فسفس دي أعمل فيها إيه؟

أشرب المشروبات اللي قولتاك عليها، وممكن تجرب كبسولات زيت  
كبد الحوت بتقوي الذاكرة بس لما تتأكد هتعملك أعراض أو  
أمراض تانية ولا لا عشان بتختلف منشخص للتاني  
بطل تقول هأنسى ومش هأفكر .. لأن عقلك بياخد دا كأمر أو  
موضوع هيجصل هيجصل ويحواله لواقع .. أنت أقنع نفسك إنه ربنا  
معاك وإنك مش هتنسى بأمره .. ودعاء بعد المذاكرة هيجفظ  
المعلومات دي

معلومات هتعرفك إنك عندك قدرة الحفظ والتذكر بس أنت اللي  
مش حابب أو بتستهيل:

- يحتوي المخ على تريليون خلية عصبية (بما يعادل عدد النجوم في  
بعض المجرات)

- عقولنا تستطيع تخزين ٦٥٠٠٠ معلومة جديدة كل ثانية (تتعلم  
وتحفظ أسرع)

- عقولنا تستطيع معالجة ٢ مليون معلومة في الثانية (تفكر  
بسرعة)



اربط بصور أصوات غنى كلمات ألوان رسومات .. العقل بيحب الصور  
بيحفظها أسرع وذاكرزي ما قولتلك وإن شاء الله خير ومش هتنسى

## - طب أنا ليلة الإمتحان م الخوف والقلق مش بأعرف أعمل

### حاجه وبأفضل متنح حتى مافيش مراجعة ؟

قوام استحمى كدا وفوق .. اشرب نعناع .. كتر ف شربه عايزه اللي  
يشوفك يضتكر ك عود نعناع هرب من الغيط .. استهدى بالله وصلي  
واقرا قرآن .. تعرف ف حالة الخوف ف أي موقف وخصوصاً لما تكون  
تعبان ف حاجه وخايف بردو اقرأ سورة هود هتهديك وتخليك  
ريلاكس .. وأكثر آيت بتعلق معايا هي آخر آيت .. قال الله -تعالى-  
"ولله غيب السماوات والأرض وإليه يرجع الأمر كله فاعبده وتوكل  
عليه وما ربك بغافل عما تعملون"

الآيت دي بتطمنك بتقولك ربنا اللي ف إيده كل حاجه اعبد  
والمذاكرة من أنواع العبادات وأتوكل عليه وهو مش هيضيع تعبك  
كان فليلتة امتحان مخي قفل ومش قابل حاجه فضلت أدور على سورة  
معينتة ف القرآن تهديني وتريحني لاقيت سورة هود لعلاج الخوف قرأتها  
والآيت دي قرأتها كتيررر .. وفعلاً هديت وارتحت .. ونمت بهدوء

## - يوم الإمتحان أعمل إيه ؟

ما توترش نفسك .. عملت اللي عليك والحمد لله .. راجع بسرعة الحاجات المهمة اللي أنت يا جمعتها ف ورقة أو معلم عليها واقرأها .. بلاش تقف مع صحابك لو بتتوتر .. لو هتتعصب أو كذا ابعد عنهم أو روح على وقت الإمتحان بالظبط .. وأحياناً للصدف اللي صحابك بيقلوه بتدخل تلاقية وساعات لا .. على حسب فيه البعض يقولك ما تقرأش حاجه قبل دخول الإمتحان جديدة .. عشان مش هتقدر تستوعبها ولا مخك يحفظها .. هو لو فصل أو باب كامل أكيد مش هينفع .. لكن قطعة صغيرة عادي .. كان فيه امتحان مادة غلست مالهش مصدر مذاكرة أنت وحظك .. المهم كانوا الدفعات الأكبر عاملينها على هيئة سؤال وجواب قولت أبص فيه وأنا في الميكروباص .. هو سؤالين تلاته فهمتهم وحفظتهم روحت الكلية فيه صحابي مش عارفين يحفظوهم قعدت اشرحها لهم وحفظوها من شرحي دخلنا الإمتحان لاقيناها ف الأسئلة وعليها ٣ أو ٤ درجات .. فرحنا جداً .. وحليناه صح كلنا .. ودا كان اكثر سؤال متأكدين منه ومن حله .. أنا لحد دلوقتي فاكرة الكلام (الفهم اللي حفظته) وحركت إيدي وأنا بأشاورلهم على المسار (كانت أعصاب وردود أفعال وكذا)

بردو دي فروقات بين الأشخاص شوف أنت اللي يريحك وينفعك إيه  
واعمله

أدعي كثير كثير .. الدعاء بيعمل حاجات كثير ويفك أزمات والله  
خد الورقة مقلوبة أو إقلبها وسمي الله وقول "الله اشرح لي صدري  
ويسر لي أمري وأحل العقدة من لساني يفقهوا قولي"

ولو وقفت قدامك حاجه قول "الله لا سهل إلا ما جعلته سهلاً وإنك إن

شئت جعلت الحزن (الصعب)

سهلاً"



ركز وابدأ يا بترتيب الأسئلة

(لو مذاكر المادة كاملة)

وحل سؤال سؤال بهدوء وقرأ

السؤال كويس عشان ما

ترجعش تشطب وتوتر نفسك

ابدأ بالأسئلة اللي تعرفها ف

الأجزاء اللي عارفها (لو مش

داخل بالمادة كلها) وحل

وبعدين بص ع الأسئلة الباقية يمكن تفكر كلمة من صاحبك أو

شرح الدكتور وعبر بأي لغة وأي طريقة

في البعض يحب يقرأ الأسئلة كلها وبعدين يبدأ يحل، لو مش مذاكر

المادة كامله يبقى أحسن عشان تختار اللي تحله، لو بتتوتر يبقى بلاش

.. أنا بيبقى سؤالين تلاته ف الورقة مش فاكهه إجابتهه يعني لو  
ركزت هأجيبهم بأحسن إني مش هأعرف أحل والدنيا تقفل ودماعي  
تضلم أكثر فمش بأحب كدا  
حل على مهلك وأقعد واقتك كامل .. ساعات الوحي مش بينزل غير  
ف آخر دقيقة هههههه وتفضل  
تشد والمراقب يشد



### - رأيك أراجع بعد الإمتحان ولا بلاش؟

لو دا إمتحان نهائي للمادة يبقى  
بلاش .. لكن لو عندك إمتحان  
شفوي أو شيت مثلاً فراجع إجابات

الأسئلة اللي شاكك فيها ومن كتب مش مع صحابك عشان لو سؤال  
منهم جه تاني .. ولو هتتوتر يبقى بلاش ..

أصل اللي حصل حصل .. هتحرق دمك وتتغاض ودماعك تصدع وتفضل  
تودي وتجب ف الموضوع .. وتسد نفسك ع الفاضي

ربنا كاتبك كدا حتى لو خرجت وافتكرت المعلومة اللي كنت  
ناسيها قدام الورقة (قدر) أحمد ربنا إنها ما جاتش ف حاجه أسوء

## - خلاص تمام .. هأروح بقى ابدأ مذاكرة .. سلام

ثواني .. لما تطلع النتيجة وجبت درجة أقل من اللي كنت متوقعها وعملت إلتماس أو تظلم وما جالكش حاجه (زي ثانوية عامة) ما تزعلش .. ربنا شايلك الكام درجة دول لمادة هتدخل مش فاتحها لأسباب الله الأعلم بيها وهيتحطولك وتعدي منها على خير .. أو غنك أخذتهم قبل كذا ف مادة زيادة عن حقك ودا أوان إنهم يروحوا منك ..

لو شلت مادة (بعد الشر) ما تزعلش ولا تقفل الدنيا ف وشك .. عادي يمكن فرصة ليك تفهم المادة أكثر أو إنك تثبت معلوماتها ثاني .. كان عليا مادة رخصة جداً كبيرة والدكاترة رخصين وماذاكرتش كويس .. صحيت الصبح أذاكر كام كلمة وماما كانت بتلبس مش عارفه إيه اللي حصل بس فجأة جه ف بالي إن ماما حصلها حاجه وهتنزل الشغل ومش راجعه (ربنا يخليها لي ويحفظها) روجت حضنتها وقعدت أعيط وهي فاكرة بسبب المادة وتطبطب عليا وتقولي ماتخافيش مش هيحصل غير الخير ربنا مش بيعملنا حاجه وحشة .. اهدي كذا وركزي عشان تعرفي تحلي

وأنا صعب عليا وقتها أقولها سبب عياطي وما تتحرق المادة إنتي أهم .. هي نزلت وأنا إمتحاني كان الضهر، وأنا راكبه الميكروباس ورايحه شغل السواق أغنية شعبي كالعادة بس يا ريتها ضحك ولا فيها أمل لا بتتكلم عن واحد مامته بعتتله جواب بتقوله إنها راجعه من الحج وهو

واحشها وعايضة تشوفه وطلبت منه يستناها .. وبعد حبة حشو ومشاعر  
وحزن وبؤس راح يستقبلها بس شاف الناس متجمعة وعرف إنه العبارة  
غرقت وإنه مامته ماتت فيها غرقانه .. أنا بقى فتحت عياط .. وافتكرت  
الصبح وف بالي ماما ماما ماما .. كنت هأكلها اطمئن عليها بس لو  
كلمتها ف حالتي دي هتتخض قعدت أهدي ف نفسي وأقول إن شاء الله  
خير ومش هيحصلها حاجة .. | وقعدت



أدعي طول الطريق يا رب يا رب لو دي  
رسالة منك بتخيرني بين إني أشيل  
المادة دي وإن ماما تفضل معايا خلاص  
.. أنا موافقة أشيل المادة بس هي  
تفضل معايا .. بعد الإمتحان روحت  
أدور على ماما والحمدلله كانت  
موجودة فضلت حضناها ومبسوطه ف  
حضنها أوووي

بالنسبة للمادة (الحمدلله) شلتها ..  
بس ماما معايا ^^ .. أصل هي اللي  
بتشجعني وتطمني .. بتهون عليا قلقي

وتخفف خوفي .. القلب الحنين اللي بالجنى ليه .. مافيش أصلاً وجه  
مقارنته بينها وبين عشروميت مادة .. كفايه إنه نفسها معايا

هي أي نعم لما عرفت هزأتني وسمعت كلام زي رصاص .. وحتى الآن  
مذلولة بالمادة .. بس ما رضتش أقولها ع اللي حصل وإنه موقف أهون من  
تاني .. ومازلت اسمع كلام يسد النفس .. بس على مين نياهاهاهاها  
من الآخر .. أعرف إنه اللي هيحصلك أياً كان من إمتياز لمقبول ومن  
شيل لنجاح كله بأمر الله ..

يمكن ربنا ف الموقف دا بعثلي رسالت يفهمني ويخيرني .. بس أكيد  
مش ف كل موقف ف حياتي هيتقدملي الإختيار دا .. لكن فعلاً "لو  
علمتم الغيب لأخترتم الواقع" .. ربنا مش بيعملنا حاجة وحشة .. لأن  
الله جميل ولا يأتي من الجميل سوى الجمال .. فأتأكد أنه دا أنسب  
حاجة هتوصلك ف الوقت دا ولو حصلتك أي حاجة تانية فنفس  
الوقت كانت هتبقى أصعب وغير مناسبة تماماً.

\*\*\*\*\*



أتمنالكو التوفيق جميعاً  
ومن نجاح لآخر  
ما تستعجلش توصل من غير مجهود وتعب  
لأن متعة النجاح ف إحساسك أنه  
عرقك وتعبك كانوا بفايدة  
وما تنسوش أنه لا حول ولا قوة إلا بالله  
فأطلب القوة والعون دائماً من ربنا  
لهتلاقيك غلبت سوبر مان وسويت الأهوال بأمر المتعالى.